

Regional News Unit AIR Aizawl
Wednesday, April 03, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Disaster Management Minister Pu K. Sapdanga'n tun hnaia thli, ruah leh rial tlain chhiatna a thlen tuartute a tuarpui thu leh theihtawpa tanpui an nih tur thu a sawi.
- Lunglei Bawrhsap-in raltlante chu ram dang mi an nih angin India khua leh tuiten chanvo an neih ang an nei ve thei lo tih hrilhin Sorkar, VC leh YMA ten inkaihhruaihna an duan te tha taka zawm turin a chah.
- Ministry of Defence chuan Pathiannia lungphu chawla thi, Indopui 2-naa ram tana pasaltha Subedar Thanseia chu an ui takzet tih an sawi.



THUNDERSTORM-MINISTER

Disaster Management Minister Pu K. Sapdanga'n tun hnaia thli, ruah leh rial tlain chhiatna a thlen tuartute chu theihtawpa tanpui an nih tur thu a sawi.

Nimina Vantlang Auhmun (social media)-a thu a puanah Pu K. Sapdanga chuan Chief minister Pu Lalduhoma pawhin khuarel chhiatna thil a nih avangin Election Commission of India (ECI) hnenah harsatna hi a thlen nghal tih a sawi a. Khuarel chhiatna a nih miau avangin inthlan puan hnu, election model code of conduct huam lai ni mah se a theih ang angin tanpui ngaite puih an ni tih sawiin, MLA te chu anmahni bialah an theih ang angin an feh chhuak a ni, a ti a. Chhiatna thilah hi chuan election thuneitu lam pawhin an hrethiam niin a sawi bawk.

Minister chuan Mizoram chhunga chhiatna hrang hrang a thleng chu pawl a tih thu a sawi a. Social media-ah video dah chhuakin vanduaina tawk zawng zawngte a tuarpui tih a sawi a, sorkarin a tih tur leh tih theih chin, danin a phal ang chin a tih tur thu leh state disaster relief fund a awm thu a sawi.

Pathianni zing leh Thawhtanni zinga to haw leh rial tam tham tak a tlak avangin Mizoramah chhiatna hrang hrang a thleng a, hriat theih chinah in 1,000 chuang a chhia a ni.

Thawhtan tuka rial tla khan Kolasib District-a khua leh veng 9-ah mihring chenna In leh mihring chenna ni lo, sorkar building leh Biak In 744 a tichhia a. In chhiate hi a tam zawk chu rial-in a chung chauh a tihchhiat te niin, thli a tel avanga Lungdai-ah chenna in pakhat chu a vaiin a chhe vek a ni. Kolasib district bawrhsap pisa-a District Disaster Management & Rehabilitation, Kolasib-in an chhinchhiah dan chuan thli leh rial thawk avanga harsatna tawk khua te hi hriat theih chinah Lungdai, Serkhan, Buhchangphai, Bilkhawthlir North leh South, N Chawnpui, N. Chhimluang, Saiphai leh Saipum te an ni a; Bilkhawthlir South-ah hian Chenna In chhia tam berin, report-a a lan dan chuan rial vanga In chung chhia hi chenna In 216 a awm a; Anganwadi Centre pahnih, PHC Quarters 7, Police Quarters 3, UPS building leh Primary School building pakhat ve ve te a chhia a. Bilkhawthlir North-ah chenna In chhia 185 awmin a tam ber dawttu a ni.

Chenna In chhe vek hi Lungdai-ah pakhat awmin, report-a tarlan a nih dan chuan thli leh rial thawk avanga chhia a ni a; hmun dangah erawh luahzui theih loh khawpa chhia chenna In a awm lo niin an tarlang. Rial-in a tichhiat chenna In 744 zinga a tam zawk 539 te hi In chung thenkhat, a zahve aia tlem chhia a ni a; chenna In 154 te chu a zahve aia tam chhia an ni. Chenna In ni lo chhe zingah hian Lungdai-a Aganwadi Centre pakhat leh Coffee Board Quarters te a tel a. Serkhan-ah pawh English Medium School pakhat leh Anganwadi centre pakhat te chu a chung a deng chhe bawk. N. Chawnpui-ah Salvation Army Biak In leh UPC Mizoram Biak In te a chhia a; N. Chhimluangah Presbyterian Kohhran Biak In, Salvation Army SS Hall, Anganwadi Centre pakhat, Primary School leh Middle School pakhat ve ve bakah Self Help Group office chung te a chhe bawk.

Champhai district-ah pawh in 134 a tichhia a. In 5 luah tlak lohvin a chhia a, In 129 chu a then azar a chhia a, chung zingah chuan Middle sikul 1, High School 1, Higher Secondary School 1, PES 1, Supply Kudam 1, Myanmar raltlante dahna buk 7 leh Distric Jail 1 te an ni. Tun thlenga hriat theih chinah Champhai District-a khua leh veng 23 a mihring 690 ten an tuar a ni. Report hi a la lut reng a ni.

Mamit district-ah chuan nimin tuka rial tla khan in 55 a tichhia a. A hma ni a thlipui tleh khan in 52 a ti chhe bawk. Khawzawl district-ah chuan nimin leh Pathianni a thli tleh leh rial tla avangin in 77 a chhia report dawn a ni tawh a ni.

Nimin tlai dar 3 vel khan Sangau-ah rial nasa takin a tla a, rial tla hian Sangau khawchhunga in engemaw zat chu a chung rangva deng chhiain rial tlain in-chung rangva a den chhiat hi a tam hle a, engzat chiah nge a den chhiat hriat theih a la ni lo. In chung chhia zingah hian sorkar quarters-te pawh a tel.

Sangau bazar Vengthar Kawna rial tla tling khawm avangin lirthei thenkhat chu helai bazar-ah hian an tang a, JCB hmanga thenfai hna thawh a ngai hial a ni.

Sangaua rial tla hi a lian hle a, artui tia dawn dawn te an ni hlawm a ni. Rial tla avanga nunna chan an awm hriat a ni lova, amaherawhchu chenna in chung tam tak a den chhiat avangin nunphung erawh a khaih lak nasa hle.

<><><>

POLL-POSTAL BALLOTS

Lok Sabha inthlan lo awm tura Mizoram Parliamentary bial atan venhimna lama hnathawktu service voter 4,963 te hnenah e-postal ballot (Electronically Transmitted Postal Ballot) thawn chhuah a ni.

Heng Postal Ballot hi service voter-te awmna hmunah print chhuah a ni ang a, vote an thlak fel hunah Returning Officer hnenah an thawn dawn a ni. Service voter hi mipa 4,872 leh hmeichhia 91 an awm. Hetih lai hian inthlan vote thlak ni-a hna pawimawh thawk tur Aizawl amite tan Postal Ballot Voting Centre chu DC Office (Nazarat Branch) ah ruahman a ni a. Karleh Thawhtanni atangan Nilaini thleng chawhma dar 9 leh tlai 5 inkar chhungin hawn a ni ang.

<><><>

DRUGS

Excise and Narcotics department hnathawkte chuan kumin January atanga March thla inkar chhung khan heroin kg 18 leh gram 570 an man.

An department thupuangtu Pu Peter Zohmingthanga hnen atanga thu dawn danin heroin bakah hemi hun chhung vek hian Methamphetamine Kg 106 leh gram 648 an man a. Ganja Kg 381 leh gram 76 an man bawk. Hetihlai hian Thawhtanni tlai dar 4 khan Chaltlang Lily Veng (State Guest House bul)-ah Heroin gram 11 leh a neitu nia puh mi pakhat - Lalmuankima kum 32, Durtlang Leitan-a khawsa nia inchhal chu an man a. He thil chhui zelnaah Thawhtanni zan dar 11:55 khan Hunthar Vengah he thubuaia inhnawih dang mi 3 - KC. Thangmawii kum 44, Zokhawthar, Champhai District; Lalthanpari kum 54, Falam, Myanmar (tuna Hunthar Veng, Aizawl-a khawsa mek) leh Tluangthanpari kum 39, Falam, Myanmar (tuna Bawngkawn Brigade-a khawsa mek) nia inchhalte an man a. Anni hnen atang hian Heroin gram 109 leh Methamphetamine Kg 5 leh Gram 888 (mum 60,000) an man bawk. Heroin leh Mathamphetamine vanga mante hi The Narcotic Drugs & Psychotropic Substances Act, 1985 tlawhchhanin thubuai siamsak an ni a. Nimin khan Special Court (ND&PS Act)-ah hruai nghal an ni.

<><><>

REFUGEES

Lunglei District bawrsap Pi Ramdinliani chuan tunhnaia Paletwa township, Chin state atanga Khumi raltlan mi 85 ten Lunglei district chhunga thingtlang khaw pakhat-ah an rawn luh belh chungchangah a hmunah thil awmdan enfiah turin Thawhtanni khan Khawmawi khua a tlawh.

Bawrsap hi SP, Addl. DC leh YMA Sub Headquarters hruaitu ten tawiaamin, Khawmawi VC leh YMA branch hruaituten an lo dawngsawng a ni. Raltlan lo lut tharte kawmin, Bawrsap chuan raltlante chu ram dang mi an nih angin India khua leh tuiten chanvo an neih ang an nei ve thei lo tih a hrilh a. Sorkar, VC leh YMA ten inkaihhruihna an duan te tha taka zawm turin a chah. India sawrkarin Myanmar atanga rawn raltlante refugee angin pawm lo mah se Mizoram sawrkarin mahni mihringpuite hmangaihna rilru avang chauhin Myanmar raltlante a lo tuamhlawm thu tarlangin, raltlante chu India sawrkar dan leh hrai te zawm turin a hrilh a. Ruihlo tawh leh سوالنا dangah inhnawih lo turin a chah bawk. DC hian raltlante chu a bika ruahman camp-ah an awm tur a ni a, VC te hriatpuina tel loin an duh duhin an zin kualin an pem kual tur a ni lo, a ti bawk.

Raltlante nen an inkawm zawh hnuah DC hian raltlan lo lut tharte awmna tur in sakna tur hmunhma a enfiah nghal a, VC hnenah raltlan lo lut tharte chenna in sakna tur silpouline bundle khat pein, tui lakna tur pipe pawh a rang lama ngaihtuahsak an nih tur thu VC te a hrilh bawk. Pi Ramdinliani hian Lok Sabha inthlan atana hman tur Polling Station, Khawmawi Primary School chu tlawh nghalin, school thuneitute chu Composite grant an dawn atanga toilet siam that tur chu a rang lama zo fel turin a chah bawk.

<><><>

AIZAWL SP

Aizawl SP Rahul Alwal-a chuan ruihhlo do chu a ngaih pawimawh hmasak a ni, a ti a; police chu man hnathawktu ni mah se a thatlohzia thehdarh kawngah nasa taka tan lak a ngai tih a sawi.

He thu hi nimina Aizawl SP Conference Hall-a chanchinbumite a kawmna-ah sawiin chhungkua leh khawtlangah ruihhlo a that lohzia chu inzirtir uar thar a ngai, a ti a; hemi kawngah hian tlawmngai pawl leh pawl hrang hrangte thawhpui a tum dawn tih sawiin police chuan a man hna thawk mah se a thatlohzia thehdarh kawngah nasa zawkin tan an la dawn, a ti.

Aizawl SP chuan suahsualna kawng hrang hrang do turin theihtawp chhuah a ni dawn a ti a, rukruk leh tualthahna ang chi sualna te chu a chhui tur bik Team din a ni dawn tih sawiin mipuite pawhin CEIR application hmangin awlsam takin phone bo leh thildang bo te an report thei dawn tih a sawi a. Naupang kum tling lo thubuai chungchang leh a dan POCSO bakah cyber crime chungchang te chu mipuite inzirtir that a pawimawh, a ti a. Hursualna kawngah mipuite chu an hriat tur thil pawimawh hrilhriat an nih theih nan tan lak a ngai tih a sawi bawk.

Aizawl SP chuan kumina Lok Sabha inthlanah inthlanna muanawm leh felfai a awm theih na'n police te'n theihtawp an chhuah a, district chhungah uluk taka venhimna kalpui a ni, a ti bawk.

<><><>

WW-II VETERAN

Ministry of Defence chuan Pathianni a lungphu chawla thi, Indopui 2-naa ram tana pasaltha Subedar Thanseia chu an ui takzet tih an sawi.

Subedar Thanseia hi Pathianni zing dar 5-ah khan Aizawl Tlangnuam vengah kum 102 mi niin a thi a, hemi ni vek chawhnu dar 1 khan vui liam a ni. Amah hi Assam Regiment a tang hmasa ber zinga mi a ni.

Ministry of Defence thuchhuah tarlan danin ram tana pasaltha Subedar Thanseia chu indopui 2-na laiin Kohima indonaah huaisen takin ram tan a ding a, Jessami-a an awm chhungin Assam Regiment tan hnutchhiah tha tak neiin a hming tha hle a ni. Ram tana sipai a tan chhungin a theihtawp chhuah thin mi, duty tura koh chuan tlan chhe ngai lo ni a sawiin Kohima indonaa a thil tih hian harsatna hlauhawm tak karah tangrual sipaite tan hnehna pawimawh tak a siam a, Khawchhak lama buaina lian zawk chhuak thei turah danglamna a siam tih an sawi.

Ministry of Defence thuchhuah chuan Subedar Thanseia chu a chawlh hnuah khawtlang leh ram tan nasa taka inpein zirna hmasawn zelna atan leh hranghluu tan bakah sipai chawl ta te tan a tangkai hle an ti a. A nun chu thang thar zel te tan entawn tlak tak a ni tih sawiin India sipai zawng zawng ten an ui takzet a, Assam Regiment ten a hmunah thlah liamin zahna an lantir a, ram zalenna atana a thil tih chu hriatreg a ni tawh dawn tih an sawi a ni. Subedar Thanseia chanchin chu hun kal tawh sawina mai ni lovin hmalam hun atan leh sipai kum naupang zawk te tana infuih tharna ni chhunzawm zel turin an duh an ti a ni.

<><><>